



Broj: 06-04-53807-15/23  
Sarajevo, 18.01.2024.godine

## **SKUPŠTINA KANTONA SARAJEVO** **-OVDJE-**

**Predmet:** Izjašnjenje na zastupničku inicijativu zastupnika Šaljić Jasmina, dostavlja se

Zastupnik Jasmin Šaljić je na 13. Radnoj sjednici Skupštine Kantona Sarajevo, uputio zastupničku inicijativu prema Vladi Kantona Sarajevo, Zakonodavno-pravnoj komisiji Skupštine Kantona Sarajevo, Ministarstvu za boračka pitanja Kantona Sarajevo i Komisiji za boračka pitanja Skupštine Kantona Sarajevo, a koja glasi:

“Pokrećem inicijativu prema Komisiji za boračka pitanja Skupštine KS, Ministarstvu za boračka pitanja i Skupštini KS, da u članu 2. Zakona o dopunskim pravima boraca KS, koji definiše kategorije pod pojmom “porodica šehida i porodica poginulog, umrlog, nestalog branioca, branilac, dobrovoljac i organizator otpora, veteran, učesnik rata, RVI, mirnodopski vojni invalid” dodamo novu kategoriju “porodica umrlog pripadnika A RBiH i MUP RBiH nakon 1996. godine”

Obrazloženje-Smatramo da su nepravedno izostavljene ove porodice iz ostvarivanja prava nakon smrti pripadnika tj. demobilisanog borca, a dale su veliki doprinos na način da su vodile računa o našim borcima i njihovim svakodnevnim potrebama tako da su borci mogli neometano obavljati svoju časnu dužnost odbrane domovine.”

Na pokrenutu zastupničku Inicijativu dajemo slijedeće

### **I Z J A Š N J E N J E**

Ministarstvo za boračka pitanja Kantona Sarajevo vrši upravne i stručne poslove utvrđene Ustavom, zakonom i drugim propisima u oblasti ostvarivanja prava članova porodica šehida, članova porodica poginulih, umrlih i nestalih branioca, ratnih vojnih invalida i članova njihovih porodica, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, demobiliziranih branioca, dobrovoljaca, organizatora otpora, veterana, ratnih vojnih zarobljenika i lica koja su kao maloljetna stupila u Oružane snage R BiH, kao lica zaslužnih u odbrambeno-oslobodilačkom ratu sa područja Kantona Sarajevo, kao i vođenje i podržavanje aktivnosti na očuvanju tekovina odbrambeno-oslobodilačkog rata 1992-1995. godine, održavanju manifestacija i drugih sličnih projekata.

Zakonom o pravima demobiliziranih branilaca i članova njihovih porodica ("Službene novine Federacije BiH", br. 54/19, 29/22 i 81/23) uređena su prava, uslovi i postupak za

ostvarivanje prava demobiliziranih branilaca i članova njihovih porodica. Članom 2. navedenog Zakona uređena je definicija demobiliziranog branioca, a članom 3. propisano je da su članovi porodice demobiliziranog branioca u smislu tog Zakona roditelji, bračni partner i djeca koja žive u zajedničkom domaćinstvu sa demobiliziranim braniocem, kao i da se pod djetetom demobiliziranog branioca u smislu tog Zakona smatra dijete rođeno u braku ili van braka, usvojenik ili pastork demobiliziranog branioca.

Odredbama Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", broj 31/22) (u daljnjem tekstu: Zakon) definisana su dopunska prava i uvjeti za ostvarivanje prava. Članom 74. Zakona propisan je prestanak prava po ovom Zakonu i uvjeti za nastavak njihovog korištenja. Prestanak statusa boraca-branitelja BiH propisan je takođe i važećim federalnim propisima iz ove oblasti, što pretpostavlja da prestanak statusa boraca-branitelja BiH, ratnog vojnog invalida ili člana šehidske porodice-porodice poginulog borca i porodice umrlog ratnog vojnog invalida, povlači i prestanak prava po tom Zakonu.

Članom 73. Zakona definisano je korištenje prava na način da se ova prava mogu koristiti dok postoje za to propisani uvjeti i da se ne mogu nasljeđivati, niti prenositi na druga lica. Ukoliko je borac-branitelj BiH i ratni vojni invalid prije svoje smrti započeo proceduru ostvarivanja nekog od prava iz ovog Zakona, članovi njegove porodice, a kako je propisano ovim članom mogu nastaviti postupak, a do realizacije ostvarivanja započetog prava.

Jedini izuzetak od navedenog, odnosi se na supruge umrlog demobiliziranog branioca pri ostvarivanju prava na novčanu egzistencijalnu naknadu pod određenim uvjetima shodno odredbama člana 19. Zakona o pravima demobiliziranih branilaca i članova njihovih porodica ("Službene novine Federacije BiH", br. 54/19, 29/22 i 81/23).

Iz naprijed navedenog ističemo da ovo Ministarstvo slijedi federalne propise, odnosno Zakon o pravima demobiliziranih branilaca i članova njihovih porodica ("Službene novine Federacije BiH", br. 54/19, 29/22 i 81/23) te ukoliko na federalnom nivou budu proširena prava ove boračke kategorije - članova porodica umrlih demobiliziranih branilaca, tada će ti izuzeci biti definisani kroz izmjene i dopune Zakona o dopunskim pravima boraca-branitelja Bosne i Hercegovine.

S poštovanjem,

MINISTAR

Dr. Emir Osmanović

Dostaviti:

- Predsjedavajućem Skupštine Kantona Sarajevo,
- Zamjenici predsjedavajućeg Skupštine Kantona Sarajevo x3,
- Službi za Skupštinske poslove Kantona Sarajevo,
- Stručnoj službi Vlade Kantona Sarajevo,
- Zakonodavno-pravnoj komisiji Skupštine Kantona Sarajevo,
- Komisiji za boračka pitanja Skupštine Kantona Sarajevo,
- A/a.

